

# Christian Meivah

January - February, 2013

Lhani seh thuso

Private Circulation

## Kitahna Hinkho

Pathenin mihem lungsung hi ave jie (1 Sam.16:6). Jesun jong chutima chun ahenga hunggho lung sung ave jie ( Mt.19:16-22). Old Testament a Joseph hinkho jong hi kitahna hinkho ahi. Aute chung a ima lungthimse aneipon, ahinkho jong lhepnan ajou thei hih beh-e. Thilneo hoa jong kitah ding ahi tin, Jesun ei na hil tauve. Mt.25:14-39 - hia hin khol gamlaa phat chomkhat vaitham dingpan, atoh khompi mithum ho toh ding apah-a adallah thusim aume.

Akhol chena kona ahung ki len, mithum ho phatchom holdan chu akholin ahile mini bouvin, asum peh chu ana veikan lhonin ahi. Amani chung akipah lheh in, chule aveikan jouloupa chu themmo achansah-e. Tulai christian eiho jong hi Pathenin phatthei bohna tampi pi eipeh-u ahi. Hiho chu Pathen loupina dia imanun hinam? Eimale eima kikhoh tem ute.

Thupi kitan nikho hunglhun kah-a din, phatpha, neile gou, chih na le hetna, boltheina le seitheina, talent, golle pai ho Pathenin eipeuve. Naveikan nah em? Lhagao mang thai holnaa nanei hinam?

Tukum hin, Pathen kipana din ipi kabolbe jou dem, ti nagel hi nam? Nabol jouna hoa Pathen ki pana natohbe jing loule, vetan, Thu pi Tan nikho teng Damuna nakison lha ding ahitai. Hijeh chun Mt. 25: 14-30 hi tukum thah 2013 in geldoh kit ute. Pathen lenggam kehben a kin a chan nanei ding Pathenin adei-e. Niseh-a inatoh nauva kitah ding adei in, Pathenin itoh diuva adei chu ibol tei diu jong adei ahi. Thil neochaa nakitah jeh in, thil len kangense ding nahi, tin Bible in aseie (Mt.25:21).

David, kelngoi chingpa chu Pathen mitmun akitah-e. Apa Jesse leh Samuel kihounaa chun Jesse in "kacha aneopen jong aum nalai-e" anatin amin jong aphah poi. Insunga apan simkham asah loup a chu vana Pathenin alung sung amun, akitahna chu ahei (1 Sam.13:14). Pathenin parikha (exam) abolnaa, David chu pass ahitai.

Langkhat-a Saul lengpa hi loup i tah in leng ahin, ahinla genthei tah in ahinkho akichai-e. Ajeh chu Saul mi kiletsah ahin, Pathen ajabol pon, Pathen sei angai pon, Pathen in adon tapon, satan in adonin hijeh chun amangthai tai. 2013 kum hin imanantai louna diuvin kihabol ute.

## Melchizedek Koi Ham?

2

Old Testament mun nia bou Melchizedek min ana kiphah poh-e. Gen.14:18-20 leh Ps. 110:4. New Testament a Hebrew bung 7 a Melchizedek chung chang akimui. Hiche hin 'Leng-dih' atina ahi. Jer. 23:6, 3:16. Salem kiti hin shalom, tichu 'chamna' ati ahin, Jerusalem kiti hin 'chamna umna khopi' atina ahi. Tun Abraham leh Melchizedek lamni in veute.

1) Melchizedek in neh le don ding ape (Mt. 26:26-28 toh tekah in). 2) Abraham in hopsom (tithe) ana pen, hopsom peh hi Mose danthu hinpeh masang peh-a ana kipan ahitai (Gen. 28:20-22 toh tekah in). Thempu Chungnung aume ti hetdoh na khat ahi. Melchizedek hi anu apa chule aphung gui kihelou, chukitle apenna leh athina jong kihelou khat ahin, Jesu khela pang Thempu Chungnung khat ahi, tiding ahimai-e.


Melchizedek chungnung dan hetna li aume (Heb.7:4-10). Hiho chu 1) Abraham in hopsom ama henga anapei. 2) Melchizedek in Abraham phatthei anaboh-e. 3) Melchizedek hi aum jingin akisei-e (Ps.110:4 toh vekah in). 4) Abraham jalin Levi in jong Melchizedek hop som anapei.

Melchizedek thempu hina leh Levi thempu hina akikhehna phabep veute: 1) Melchizedek hi leng jong chule thempu jong ahi. Levi vang thempu ahin, leng hina Judah akipei.

(Heb. 7:1-2,14). 2) Melchizedek in Abraham chu neh le don ding ana pen, hichun Kitepna Thah avetsah ahi. Levi in Israel te dia amu maicham thilto ho phabep bou Israelte anapei (Gen.14:18). 3) Abraham in Melchizedek chu hopsom anapei. Levi in Abraham vangin hopsom anapei (Heb.7:2-9). 4) Kipeson thei lou thempu hina Melchizedek in anei in, hichu hingjing, leh atonsot (indestructible life & permanent priesthood) a dia ahi. Levi thempu ahi vangin athi thei-in, chule chomkah-a (temporary) dibou ahi (Heb. 7:3, 23-24).

5) Abraham phung gui-a Melchizedek aumpoi. Ahinla Levi hi Abraham phung gui-a kon ahitoh-e (Heb.7:6). 6) Melchizedek in Abraham hi phatthei anaboh in, hijeh hin Abraham sangin Melchizedek alen joi ti akihei. Levi vang hi Abraham in phatthei aboh thei ahin, hijeh chun Melchizedek sangin aneojoi (Heb. 7:6). 7) Pathen henga lhunna thei Melchizedek in ape jouvin, hichu achamkim in ahi. Ahinla Levi in Pathen kom lhun jeng theina abol thei pon chule chamkimna jong anei poi (Heb.7:11-28). 8) Pathen kihah selnaa kona Melchizedek in na atoh ahin, Levi a hitobang chu aumpoi (Heb.7:20-21). 9) Achanga them pu lhingset tonsot thempu ahin, Levi vang thiji, mi kikhel jing le achang uva lhingset jouloute ahi (Heb.7:23-24). 10) Melchizedek hi ama chon setna, (aban phengmai 4 na ven)

### ***Mihem Jonga hungkon***



Miching khat in eiho hungonna hi jong ahi ati. Aman hiche lim kivetsah-a banga hi adihna aseih ahi. Nangla nanop em? Christian ana kihilou hileh itahsan diu dol ahi. Jong (monkey) a kona mihem ahung sodan hi kilom tah ahi.

Oxford University, London ten amudoh dung jui in, jong jat ho lah-a Chimpanzee kiti jong hi adeh in Africa a aumin, atahsa kism dan mihem to akibahna atame, tin aseih ui. Jonga kon ihi diuleh jong hi ipu ipateu hidiu ahitai. Iti nagel em?

Genesis 2:7, “Pakai Pathen in tola leiset leingan in mihem asem in, mihem nahhom teni sungah, ama hinna hu ahailut peh in ahile mihem chu mihing pasal khat ahung hitai”. Hiche a kona ihet diu hi, bel kheng them penpa Pathenin leiset a kona mihem ahinsem hi thilkhat tobang ahapon, achombek ahi, ajeh chu lei a kona asem pasal hi amatah hu alha khuma tichu ahinna apeh-a ahinsah ahitai. Pathen in ahinna mihem apeh jeh in, mihem hi gancha ho bangin athi teng akichai jengpoi. Thitheih lou lhagao inei uve. Pathen sem mihem nahikhah nakipa lou ham?

3

Leiset a kona Pathenin pasal khat ana sem chun achat theih poi. Ahinla amatah hu ahaikhum phat chun ahing tan, achatle theih tan ahi. Pathenin hiche hinna hu hi alahmang tengle mihem hi lei-a kism milim tobang ahikit jin, leiset asoh jitai. “Nangma leivui bou nahin, leivui naleso kit ding ahi (Gen. 3:19). Ei hoa kona hin-jouna hu hi, Pathenin alahdoh tengle itah sau leiset-a akile kit in, leiset asoh ji tai.

Hijeh hin eiho hinna le thu pina hi Pathen Lhagao jeh ahi. Mi tamtah in abol theina le ahinna hi ama semdoh danin agelin akilet sahpi jie. Mi abang man ahinna le ahinkho athilbol theina (talent) ho panna bei in agelun alung hop jiuve. Hichu adih poi. Iman tam danu hi Pathen a kon ahi (Gen. 2:7).

### ***Numei Naovop Thu***

Numei jinei thah naovop loi joulou, tulai hin atam cheh cheh in ahi. Naovop theina dia numei tipum le lungthim kigongsa aum ngai ahi. Tulai hin numei athao behseh le agih beh seh in nao avop vahpoi. Dum chep, khaini, jarda, judon kitiho hin jong naovop joulouna asosah jie. Tui atam don jep-a chule theih jong niseh-a aneh ngai ahi. Coffee don jong aphapoi. Vitamin ho adeh-a iron leh tahsa damtheina neh le chah (nutrients) ho phatea aneh angai-e. Chule numei akum 30 lhingsa ho naovop aboi jep jin ahi.

4

### ***Jesu Pathen Chapa***

Jesu hi Pathen chapa ahinai tina veute. Hebrew bung khat-a, goulo pa, ima jouse semnaa pang, Pathen loupina neipa, Pathen koi ham ti kihetna, ima jouse ama thu sah-a kona chekhom, chonset ngai damna nei, Pathen jetlama toupa ti ho akisei-e. Hitia akisei tengle Jesu hi tonsot-a hing jing ahina akihen, chule lhandampu ahina jong akihei.

ho ngaidam channa dia kilhaina gan tha abol ngailou ahin, Levi hon vang achonset thensona dia kilhaina gan tha (sacrifice) akibol angai-e (Heb. 7:27). 11) Melchizedek hi Pathen chapa chamkim tah chu ahin, Levi vang lhahsamna nei mihem hina neite ahiuve, (Heb.7:28). (Hiche tekahna somle khat hoa ‘Levi’ kiti hi Levi thempu ho kiseinan lauvn).

### ***Hebrew Lekhabu Thudol***

‘Hebrew Mite Henga Lekha Thot’ kiti lekhabu hi, kum 64-68 A.D. sunga ana kijih, tichu 70 A.D. a Jerusalem hou-in kisuh chim masanga kisun doh anahi. Heb 9:10-11. Ajeh chu Hou-in kisuh set a konin Levi ho themputna kilhaina leh gantha maicham ho ana umthei tapoi. Hiche lekhabu hi koipen sut ham tijong akihedoh joupon, Paul, Barnabas, Apollos, Philip amaho lah-a khat hidin ginchat ahi. Rom 9: 4-5.

Hiche lekhabu hi hou-la nei a, ahiala tahsan bei ho henga kisun ahin, Judah mi christian hiho, Rome, Palestine, ahiloule Alexandria-a cheng, in-ina kikhom ho, henga ki sun hidia tahsan ahi. Lekhabu hin Jesu hi Thempu Chungnung in aseih in, chule goulona, kicholdona, chule chamkimna thudol aseih-e. Kitilkhouna leh hansanna chule kipana lam thudol jong aseih-e (Heb.6:18). Kitah tah-a panna, akhonni gei-a thoh a, Jesu lam kat jing dinga hilchahna, gihsalna thu jong aume (bung 12).

Colossia bung khat akisim leh Jesu koiham tina, lam sagin aseih chene. Mutheih lou Pathen lim, thil sem jouse masanga peng masapen, mutheih le mumo kism jouse amaa kona kism doh, atonsot-a um jing, ama vanga ima jouse chekhom jou, tahsa (houbung) luchang, athi lah-a kona peng masapen tichu thilsem thah kipatna, tiho hin Jesu hina aki phong doh-e. Mihem khat ahung pen tengleh alu ahung pot masai, hi ti bangma chun mihemte lhagao lam a apen thah tengle tahsa (houbung) sangin aluchang (Christa) amasajin ahi.

### ***Pathen Adih-a Houding***

Ps.146:1-10, Acts 4:8-23 Vannoi chitin namtin koima Pathen helou aumpoi. Ahinla Pathen hetdol hi jatchom cheh ahi. Ajeh chu mihem sempa Pathen chu asemsaten lunggil in ahe jingun, mitmu theih lou, lunggil a milmo ahijeh chun mitin in ageldola Pathen ahisah dol dol-a ahou jeh-a

Pathen houkhelna umdoh kha ahi. Lung ngaitoa ahisah pathen chu, pai manga Pakai Jesu, mitmu thei-a hungpan eiseipeh-u Pathen, chu adih tah-a houding joh ahi.

1. *Lystra khomi ten Hermes le Zeus chu Pathen ahisah ui.* Lystra khomiten Pathen ahou khelna chu, William Barclay thusim sei Lucaonia thusima, phat khat chun, (i) Zeus le Hermes atiu Pathen te leiset-a mi hem lima ahung lhon chun koiman alamto pon, loubol mai-mai nupa khat in alhunsah jeh-a, (ii) Midang ho athagam lhona, amani nupa phatthei chan jala Zeus le Hermes ana hou-u thu aseie.

Paul le Barnabas in Lystra khoa Jesu huhhingna thupha aseie lhona kona, apena pat kengbai khat adam sah lhona, lam ajot thei jeh-a amani chu Zeus le Hermes ahisah uva ahou got-u thu aume. Paul le Barnabas chu bong ima thaa ahou got phat uva, Paul in apho uva, “Mi ho idia hiti ho nabolu ham ? Keini jong nangho banga mihem kahi lhon in, hitobang pannabei hoa kona hi van leiset chule twikhanglen le asung a um jouse sempa Pathem hing jing henga nakiheina diuva Kipana Thu pha kahung seipeh lhon nahibou ui” (Acts 14:15), anati.

Huhhingna thu sei-a, thu sei ho khen them ding, Pathen houkhel ho chu Pathen adih-a housah ding, hi tulai christiante mopohna ahijoi.

2. *Mitmulou Pathen adih-a hou ding :* Mihem jousen Pathen amu nom cheh-e. Abang bangin tahsa tah-a mu atup in, abang man jan mang beh-a mu adei-e (John 14:8). Jesun Philip jah-a, “Vo Philip, hitih chan nangho kumpia, nei het loulai ham ? Kei eimua chun Pa chu amu ahitai” (John 14:9), tin kichen tah in ana seitai. Jesu chu mihem lim le melpua ahunga ama tahsan jousen Pathen dih chu amua ahitai. Jesu tah san jala Pathenin mi khat chu Lhagao afeh tengle, ama chun Pathen dihtah ahet doh-a, atahsana chule Lhagao chang ahitai.

3. *Jesu tahsan jala Pathen dih ki hedoh jou ahi :* Eden hona satan in mi masa teni ana chonset sah ni khoa kona satan suhmangna dia nu mei sunga Jesu hung peng dia, Pathen in anaseisa ahitai (Gen 3:15) kiti hi tashan ding ahi (Gal. 4:4). Jesu tilou thil dang imachan, van le lei-a thaneina jousen chonset asu mang joupoi, chonset man thina ahin, kithat-a thitasa Jesun, thinaa kona ahindoh jeh-a, thina asuhmang thei ahi (Rom.6:23).

Athisa hindoh kit sah thei-a chu, mihem hinna (lhagao) pepa Pathen dih Jesu bou ahi (Rom.6:23), tihi akiphong doh tan, hijeh a chu Jesu tahsan nan Pathen eimusah-u ahitan, lung suhtoa le ginchat dola Pathen houna hi abei doh tan, Jesu tahsan nan bou Pathen adih-a eihou sah thei-u ahitai.

Christiante hin Pakai Jesu tahsan jala Pathen in lhagao eipeh uva, hiche Lhagao mapui-a hing ihi uvin, Lhagao kipe jouse chu Pathen chate, sopi le pumkhat ihinau hin Pa then hou dih ihiu aphondoh ding ahi. Lung suhtoa Pathen hou ihiuva, ilung gel gela lamchom cheh jot, atum apai-a kalsong ihiule Jesu itahsan lou lai-u hia, semthu pathen hou ihi diu ahi. Hijeh chun Pathen houdih dinga Pathenin ama Lhagao apehte ihinau, kisopi ngailut le pumkhat-a vanlam jon ihinau chu tu leiset khang damlai sunga natoh le hinkhoa pum khat ihinau kilangdoh ding ahi.

(Dr. T. Lunkim )

### Pa Umtah Lou Teng

Incheng khat insung khat a dia pa (father) kiti hi aumlou tengle incheng khat hinaa din a-onghom khat aum jitan, insung chu ahina ding dolin aumtheiji tapoi. Pa umlounaa minu hi itobanga lunglen numei hi jongle phat khat khatle insunga pa umlou jeh chun lungthim thomhaona aumjin, itihama midanga kona hou set ham ahiloule igel toh banglou tah-a min eihou tengle, ipasal aumlou tah jeh chun, lung neona, lhasetna, ja chatna, langin akigel doh jitan ahi.

Pa umlou jeh chun, chaten jong anuthu amanlou teng, anu din lhasetna ahijin, ajeh chu pa damna lai ho chu chaten thu amanlou teng jongle ‘napan ajahda ahi’ tia anun ati peh leh akichat jep-u ahin, anu

adin apoh ajang jep jie. Pa umtah lou jeh chun insung minu chu, aki sem hoijep jongle ‘khuchenu pikhu’ akism set jongle ‘khuchenu pi jong khu’ ahanui jongle ‘khuchenu khu’ tia min aseiam agel ham ahijin, um didan ahah jeh jie. Chate din pa umlou hi aloi apai lah-a lungneona ahin, atup-u jong adei bangun amol so jou ji pouvin, apa aum tah lou jeh chun chihna le them jilna lama jong alhasam jep ji tauve.

Hijeh hin insung khat-a din pa kiti nei nalai te din loupi tah le mantam tah ahi. Itih chan idam khom diu, ija ihet um, inu ipa toh iumkhom pet hin, nu le pa jabol utin, kilungset ute. Insunga ‘hepa’ tia kou ding nei talou teho Pathen Lhagaovin umpiu hen chule lhamonu hen !

(Mrs. Lhingja, Hinna Changlhah)

### Thuthah Pen Chu

Pasal khat in leiset akhol chai in, ina ahung kile leh aloi hon availhun in, “Sopi Tennyson, vannoi leiset nagakhol chaitan, ipi pi thuthah nahin poh hinam ?” tin ana dongui. Ama chu ading doh in, “Sopite, Jesu athin athoudoh kit tan chule Jesu hung kit-a angailut cheng ahung pui ding ahi” atin atoutai. Aloihou chun, “Golpa Tennyson, hiche thu chu kei hon sot-a kahetsau ahitai. Nakhol chena nathil muho le thu thah-thah bou kangai nomu ahi” ahinti tauve. Aman, “Sopite, kakhoh chena chun mi loupi tamtah kagamun, Jesu sang

a loup kamupoi. Thusei them le thu ngai tah seithei tapi kahin mun ahinla Jesu sanga ngainom um le vet nom um kahin mupoi. Amahon, “Hi che ho chu ihetsa ngeni asehi bou ve,” atiuvin ahi.

Tulai leiset akhan touva chih na thepna asan lehe phat hin, leiset hi neocha tobangin akimutai. Het nom le vetnom atamin, thu athah ho jong atamin, T V le Mobile toh iki lhakang nom tapouvin, min Bible thu le Pathen thu asehi tengleh kahetsa ahi itiuvin, idon tapouve. Hou-in kai sangin ina cricket kichap joh T V nilhuma toupi ingap tauve. Bible thu hi chemtat te thusim danin ingaito uvin, ingai vangun ilung uva achang jou tapoi. Tennyson gol ho ngainom thu ho bou chu tulai mihon angai noma aholin aumtai.

Hijeh hin houbung sunga lha gao alhasam tan, hou thua tuinaalna akem tai. Pathen thu adih in ilauvin, athupeh init nom pouve. Samuel in Saul henga, kithoi, Pathena kilhaina hohi Pathen dei chu ahipon, athupeh nit chu Pathen lhaina ahijoi ati. Pen Thah (born again) hi mi jousen adei un, ajanom cheh un, ahinla penthah ding iti pouvin, het thoa seitho ding bouvin ingai touvin ahitai. Nungah som thulem (Mt. 25) a, thaotui keng lou ho kangaito le nasa kasai. Jan khovah-a agangau bana, thaotui cho a achelaan kah uva, mou inneipu hi ahunga kot ana kikha khum jengu hi, amaho dia iti lungnat uma hitam !

7 Penthah deitho ho toh katekah jin, thaotui kengho sanga chol deh-a pan laho adau ahitai. Chule vannoi leiset thu thah thah-a kisalel a cholle nanga pan lajing hon, Pathen thu hi hetsa ahi, thului ahi, tia nahsah louva umho ada ahivu. Pathen thu hi hing jingle natong hat jing, hemto chem jam jouse sanga hemjo ahidan heute (Heb. 4:12). Lungthim ngaito hetoh pai jeng ahi.

Pathen lhachate lam kangai to tengle, iti hitam, ole kaphahlel jeh hamla kahepoi. Pathen natong lha cha loi khat in, govt. natoh banga gela, inchen dohna le kihinsona thei thei-a, kigela jong aume. Lhagao mangsa ngailutna sangin sum ngai lutna lam hatjoa hita ding ham ? Lhagao mangthai ho hola, huhhingna mu sah-a Pakai anga puilut hi Pathen lhacha ho kin ahi nalai-in ahi. Khang dong ho atamjo hi vannoi nopsahna leh vetnom ho, ngainom hon alhoh mang ahitai. Lepui utin, alhagao-u hudoh ute. *Tong jingin, chim lou vin tongin, lhagao mang ding in lei aloi. Vannoi gam tina vahlen lang lhagao mangte chu puikhom in* ( Hb. La 187).

Suma kitah loute le bat nah sah loute ihu ham ? Eiman ima cha kibol lou ahivanga mi natoh ki oi moa, seise them ihu ham ? Pathen hou ithau noma, Pathen thu nahsah lou ihu ham ? Penthah idei un ipeng thah nom pouve. Thupha idei un, thu tah ijanom pouve. (Rev. Seikholen)

## Thoukangpe Nat, *Dengue*

Thoukang ajempol sappao a *Aedes Aegypti* in mi apeteng *Dengue* tia kihe thina thei nat-hi aki veijie. Apat lou dan hi mihem thisan sema pang thi-kang (white-cells in blood) hi aneh-hengji ahi. Hijeh chun hiche nat veiho hi akijen loi louva ahile mi thijia ahi. Doctor hon adamlou thisan chu nikhat le nivei cheng avejiu vin, athi-kangpa chu kemsuh suh em ahiloule kaltou nam tiho ave jiuve. Hijeh chun hiche nat veiho hi hospital phaa jenloi ngai ahi.

Dengue nat veiho hi khosih lehe uva (sudden onset high fever), aluchang hanat-a, amit naa, atipum naa, agu achang naa, aloh soh-a chu le atha jong bei (achon khedeh) ahi. Mi abang vang, a-oi naa, anak akam leh ahani hoa kona thi pot ahi. Mi ginmo ho chu doctor hon dengue serology (laboratory test) abola kon a amat dohji ahi. Hichu confirm bol na dia Mac Elisa test abol kit jiu ahi. Ati-achang anat jeh-a *Aspirin* lou pehlou ding ahi, ajeh chu aspirin aki pehle athilo thei jie.

Hiche thoukang hin adeh a sunle bou mi apeji ahi. Mi nasatah a titho-khosih nei, a *temperature* sangval ho chu hiche nat ginmoa doctor a pohloi ngai ahi. Assam a hiche nat hi 2012 kumin ahung lhung in, mi 400 vel anaan, mi phabep pi jong athin, athi lah-a doctor jong ajaovin, kichat umtah nat ahi.

8

In vela twi kikhol, alonglou ho suh mang ding, kerosene twi veiden hoa suna thoukang nou thading, thou kang kipesah lou ding, thoukang daldohna lou leh meikhu ho man chah ding, tiho hi kihonna ahi. Na chenna mun chu hiche nat hin ahin phah ahitan, ching theile lim geh chan umun. Hiche nat hi Charles Franklin Craig in 1907 kuma ana mudoh pan ahitai.

## Kum Athah, 2013

Kum thah-a ilut teng kipah choma akihi. Ahinla kum thah-a ei hinpui lut uva Pathen henga kipana thu ilhut uva pha ahi. Thina tohman louva Pathenin hinga kum thah imu sah kipa aume. Mi tamtah in 2013 teng hitin kitepna akisem jie :-

Insung mitoh phat tamman ding, tahsa damna dia kihabol ding, lungnem kithem chuh ding, thohhat ding, Dumchep le mom boltah lou ding, bat le tham sah ding, thil thah thah ngaito ding, Ju dontah lou ding, midang kithopi ding, insung suhtup ding, chate dopsang ding, Bible hasim ding, Pathen toh kinai cheh ding tihoa kitepna anei uve. Apha lama kitepna neihi thilpha ahi. Kinop sah kiti hi bolta poute. Tulai khangin kinopsah eima manna ahitai. Ajeh chu Pathen Gam naichaa aumtai. “Kei kathen bangin, nangho jong theng un” tin Levi. 19:2 a Pathenin eina hil tauve. Lung sunga Pathen thu achen loule iti kithen ding ham ?

2013 sunga, ama lungsunga Pathen thu khumlou mi chu vangpha lou ding ahi. Ajeh chu Pathen Gam anaimong tai. Pathen noise poute. Ps. 119:105 in, “Nathu hi kakalsena thei thaomei ahin, kalampi salvah-a pang ahi” tin aseie. Tu ni nununga hi Pathen thu ihinpi lou ule, ihinkhouva ikipalna diu atama tam ahi. Hijeh chun tukum in Pathen thu geldoh jingute.

Kumlui (2012) chu achea ahitan, 2014 ahung ding kum ahin, chule 2013 kum hi Pathenin ipheh-u thilpeh (gift) ahi. Manbei-a Pathenin napeh kum hi naman khel leh nang ma namoi. Hijeh hin phat moh suh mang ding gopoute. Imu jouse apha ahapon, aphaa igel jouse jong apha ahipoi. Itih chan nahin ham, tichu thupi ahapon, ama vang thilpha bol naa iti hinkho naman ham, tichu thu pijo ahi. Ihinkhou hi Pathen kipana din mang cheh ute.

### Jesu Nung Jui

Mt. 10:42 a Jesun hitin ana sei-e, “*Kaseijui te lah-a aneopen khat, seijui ahina jeh-a, twidap khon khat pejeng jong chun kipa man akisan tei ding ahi.*”

Pathen natong dihtah, khat khotoa chun, thilpha abolman akisan ding ahi. Bible a hin, ‘akisan tei ding’ tin akisune. Hichu soilou tina ahije. Pathen mina hou lhacha khat panpi jousen, ‘kipaman akisan tei ding’ ki tia ahi. Tulai a Jesu mina thilpha bol

hi christian hilouho jong ahikha jiu ve, atohphat manu Pathenin apeh tei diu ahi. Iti lama kipaman kipe diu ham tivang Pathenin kihet nante. Hi che editor pu jong Pathen houlou ho henga Pathen thu lhangsama aloi ho toh christian hinomlou khohoa achena hoa, Jesu thu angainom beh sehluou vanguva, bu anehsah-u aum jin ahi.

Pastor P.G. Vargis in North India a Katra muna Pathen na atoh tillai chun, nikhat CID officer khat ahungin, koi sum amana Pathen na atoh ham, ahung donge. Koiman sum eipepoi, tahsan jala Pathen na katoh ahijoi, tia adonbut leh officer pa chu anom hih-e. Atah san theilou phat chun, Pastor pan hitin ana hilchene:

“Nikhat ka-inuva neh ding imacha kanei pove. Kachapa kum khat bep chu agilkel jeh in akap kap jenge. Chuphat in kajinu le kei in, ‘Pakai, keini hi gilkel dangchah thoh jou kahi lhonan, kachapan athohjou tapoi. Kachapa neh ding beh hin ngaiton’ tin kanatao lhone. Katao jou lhonin, kajinun kachapa chu twi beh donsah din, bu-ina anachei. Ama ahung kile loi in, ‘Bu-ina koi ham khat in bule me lhingset in ana koi-e’ ahinti. Chuin bule-me dingin taona kamang lhonin, kipah in kane tauve. Ajing nikhon jong, apha chan bule-me insunga ana um kit in, taona mangin kane kit uve. Anithum lhinnin, kataopet lhonin, bu-ina kong akisu-gingin, kaloinun thip beh

a adellut le ka-inhengnu-u aina aki nungle amui. Ajipa hi Hindu thempu ahin, christian kahi jeh uva ivetdau ahi. Kaloinun, ijeh-a nithum jen bu ahindop peh-u ham, tia adohle amannun, ‘lungang hih un, ken bu kahin dopji ahi. Ajeh chu kalung laigila hin, bu gapen tina aumjinge’ anatin ahi. Hiche thusim hi CID officer pu heng a kasei-a, Pathenin apha phat-a ka taona eisan pehji jeh-a hinga kahi, kati leh ahethem hih beh-e.” ati. Sangan (donkey) in Jesu ajentheia ahile mihem in Pathen ajenmo ahipoi (Mt. 25:40).

### Nui Jiji Damtheina

\* Anu golnu henga, “Nuneo, nang hi nahoipoi” tia aseie leh anun aphoh in, ngaidam kithumin, anati. Chuin ahenga achen, “Nuneo, ajoa kathu sei chu na-ngainom lou ding kahei, nei ngaidamin, ahinla nahoimo vale” anati.

\* Saichang khophat lai-in, nikhat khoa mongphung chung vela van leng ahung lengin, ajingin khomiten ahung len kit leh a-ona ding tin, mong phung chung chun thaang anakam ui, akiti.

Saichang khophat lai-in, ni khat football apeh ule, Seilen in Thangmang keng apeh khah jeh in judge pan Red-card apeh le Seilen in, ‘kapot tah leh chapa gap inge’ atin committee akihou un, Red-card chu Yellow-card in akhel un, apeh jom sah tauve. (K-3, Nov. 2012)

\* America, Japan chule India, chih na lama ana kitet ui. America pan “Keiho thepna kidan dan hi, Jet van leng kasem hou alen teng, van atong kha deh deh uve.” Japan leh India mitenin, “Hichu iti hithei di ham?” ati lhone. America pan, “Vana kona inchi khat bep vel-a lengji ahi,” ati bei.

Japan pan, “Keiho sem twi noi-a Submarine in, Ocean to agot chem chem ahi” ahinti. America le India in, “Iti hithei ding ham?” ati lhon leh, “Ocean tolmai a kona inchi khat-a Submarine katolu ahi” ahinti.

India pan, “Keiho India ten vang kanah-hom uva an kaneh jiu ahi” ahinti. America le Japan pan, “Ahilou beh thu seihih in” tin adon but lhone. India pan, “Kana homa kona inchi khat noi-a bu kaneh jiu ahi” (hichu akam aseina ahi) ahintin America leh Japan chu ajou dapdel jenge.

\* *Ojapu* - Manglun, nanu le napa itih-a kicheng ham?

*Manglun* - Ojapu, Kei pen masanga kicheng ahilhonin, hichu apha le anikho chule amun jong kibang ana hi.

\* *Chapan apa henga* - Hepa, idia kapu sam kanga ham?

*Apan* - Sam kangin, miching hina ahetsah ahi.

*Achapa* - Chuti chuba hinahta, na sam avom-hi!

\* *Ojapu* - Thangboi, napan ipi atoh em?

*Thangboi* - Kanun aseie sei atonge.

## Het-a Phachom

11

\* Maharashtra a Gaikwad Prahlad kiti mit-thop khat evangelist a agoi ule amachal l'heh in, kum 26 na ahin toh ahitan, mi tamtah Jesu atahsan sah tai. Ajinu le acha 4 ahive. Mit thop, elbai jong evangelist in goi-in.

\* Nagaland a HIV natvei ho lah-a 89 % hohi akumu 15-45 sung ahi. Dimapur, Kohima, Tuensang a atom deh-e atiuve. Hichen eihilnau chu ahile khangdong ho hung l'hom ding ahi, tina ahi, ajeh chu nat hin mi athisah tei ahi.

\* Ministry of State for Minority Affairs, in pre-matric scholarship anei ahin, tuni gei-in Muslim simlai mi lakh 95 velin, aphatchompi uve. Christian educational institution hole simlai hon hiche scholarship hi kilah thei ahi. 2012-2013 din crore 900 ahi. <http://momascholarship.gov.in> a holin.

\* Canada, USA, UK hoa hou-in lui sagi vel, hindu kiloikhomna hon amaho hou-in din akichoh tauve. Ipi jeh hintem tia akholu leh, tulai miho hou-in kainom aum tapoi, milim hou hon akichoh-a amaho hou-ina aman jong, hou-in ahi thouve, ati tauve.

\* Guwahati a govt. bong-vahna a bong 1400 leh bongnou 500 aumin amahoa kona bongjun nikhat-a hai (bottle) 1000 soh ding ahin, bongjun a kona Ayurvedic lou semding agel

pat-u ahitai. Hiche lou hin cholestrol asuh l'hom ding, tahsaa thaona jong akem sah ding, detoxifier, anti-oxidant hiding ahi.

\* UNO in kum seh-a November 10 nikho hi "Malala Day" tia nit ding atitai. Pakistan a thingnoi mi Taliban ten, Muslim numei lekha sim aphallouvu ahin, Yousafai Malala in numei lekhasim ho atilkhoh jeh-a aluchang akap'peh-uva, tua hi UK a kijeh ahi.

\* Kuki Inpi Manipur, lamkai thah ho : President - Mr. Thangkhosei Haokip, V/Pres. - Mr. Haujakhup Chongloi, Gen. Secy. - Mr. Khaimang Chongloi, Secy. Inf. & Pub. - Mr. D. M. Touthang, Speaker - Mr. Ajang Khongsai.

\* 2013 a Palm Sunday - March 24, Good Friday - March 29, Pentecost - May 19.

\* Minit khat sungin, vannoi letset hi kolphen (lightning) 6000 vei vel akap'jie . . Vannoi leiset gamho lah a Post Office tamna pen India ahi.

\* ECA Women Ministry Diamond Jubilee lopna, Feb. 6-10, 2013 a um ding . . . 61st. ECA Annual Assembly, Feb. 21-24, 2013 a um ding ahi.

\* Guwahati a hotel khat-a sopi Nagaland, Phek lam minin cha adon le lou alhah khumu hintin, aloukham pet lhonin athil jouse ana kichom peh lhon tai. Kichih thei-un.

12

*Christian Meivah* - sim ho taona akiman peh jinge. Kum 2013 a kona sumto Rs. 100/- ahitan, asim nom chanin hin peuvin, sum napeh l'haa kona kum khat na kisim peh ding ahi. M.O. hinthot hon Editor kipe ding lekha beh a namin le address suntei un. Editor pa Mobile No. 94355-51080. Sumto peh na thei (Manipur le Nagaland a) :-

- 1) Mrs. Neijathem Haokip, Haokip Veng
- 2) Ms. Lhingianem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, cccpur.
- 7) Rev. Seikholen, Medziphema, Nagld.
- 8) Mr. Seikholon Singsit, Kohima.

## Het a Phachom Ho

\* India a High Court 21 aume. Anthology hi 'pahcha lampang jil na' (study of flowers) kiseina ahi.

\* Manjula Sen in, "If you like teaching and have a good English speaking skills, the world is your oyster" ati.

\* Mizoram a child drug addict ho 10,000 chunglam aumtai, atiuve.

\* Hani, ha, chule akam sung nat jeh-a kamka theilou atamjo hi gut ka, supari, pan masala, khaini, ja mom jeh-a cancer veiho ahijie.

\* *Catherine Pulsifer in asei-e* : "One of the best lessons you can learn in life is to master how to remain calm."

*Christian Meivah*

January - February, 2013

PRINTED MATTER

To :

Editor :

Rev. M. Haokhothong, C/o, Kim  
Emmanuel Hospital Association  
CBCNEI Compound, Panbarazi,  
P.O. Guwahati-781001, Assam.